



## Q U Æ S T I O M E D I C A.

CARDINALITIIS DISPUTATIONIBUS  
manè discutienda in Scholis Medicorum  
die Jovis 18. Martii.

M. CLAUDIO QUARTIER, Doctore  
Medico, Præside.

*An vitandus somnus statim à cibo ?*

### I.

**M**INUS cautè suis Ille rebus prospicit, qui pulchræ  
& amabilis Sanitatis tuendæ studio molliori ducitur,  
cum jure censeatur summa Mortalium felicitas. Sa-  
nitatis ope & subsidio ad præclaras actiones aditus  
datur : Eâ Corpori denegatâ seepissimè marcet Animus, & hujus  
fit consors intestinæ calamitatis, quæ nata cum ipso virtutum se-  
mina non finit adolescere. Opus est igitur in hunc vitæ tenorem  
diligenter incumbere, quo, qui laudabilem Corporis habitum for-  
titi sunt, his Naturæ commodis & muneribus terque quaterque  
beati, constanter gaudeant. Ii verò quorum Corpus ita constitu-  
tum est, ut causarium sit lacerum & caducum, ac proindè variis  
cladibus & procellis magis objectum, Artis divinæ salutaribus in-  
stitutis utcumque sustineant, & ab acerbiorè fato liberent. Utrif-  
que idcirco conducet aër salubritatis dotibus celebris ; Omnis er-  
ror in victu fugiendus ; nunquam proderit otio & ignaviâ torpere,

sed exercitationibus assuefieri, quibus, ut triticum ventilationibus, Corpus perpurgetur, alitur, nitorem & robur acquirit; Juva-bit item nullis impeditum excrementis tenere; Musarum inimicæ veneri vacare non crebrò, cujus abstinencia promittit grandius ævum; Animi motibus injicere compedes; in vigiliis servare modum; vitare tandem intempestivum somnum, eique sic indulgere, ut, quam inspirat Natura viam tutiorem expediendæ salutis, ab eâ nusquam aberrare liceat.

## I I.

CUNCTIS Animantibus communis somnus, deditæ laboribus vitæ præfens est perfugium: verè Homini *λυσιμύκτης*, quippè huic etiam datus ad solitudinum medicinam. Illo pretioso Naturæ dono Animus quasi levocatus à societate & contagione Corporis feriat: Corpus labens & inclinatum mirificè levatur. Ac quomodo Milites tristibus excubiis, bellique durissimis operibus penè exanimati, ut vires reficiant, jubentur ad signa convenire, ibique paulisper otiari, ut inde, iis redintegratis, aciores ad pugnam redeant, novisque & ingentibus cæptis animosè dent operam: pari modo calor & spiritus vigiliis, atque cogitandi sentiendi movendique assiduitate non parum exhausti, quicquid in iis fuit acceptum detrimenti, sarciant eo tempore, quo ex quietâ mente & bonâ cerebri temperie nascitur hæc functionum penè omnium animalium cessatio, adjuvante plerumque succi benigni anathymiasî, quæ ad ipsum ut *πρώτον αἰσθητικόν* seu fontem sensuum fertur, eos amico quodam & familiari vinculo ligatura. Et licet Homines per vigiliam maximè vivant, & tunc parvi sint pretii, cum vigilare cessant, hos tamen vis somni domina summo jure petit, cui, si sese dedere, ejusque lenibus imperiis cedere reculent, certo eorum capitis exitio futurum. Naturæque placitis & communi omnium bono sancitum est, diurno nocturnum esse salubriorem, ut diurni laboris molestiæ blandâ hacce remissione castigentur, quem etiam suadent cadentia sydera, dulcem invitant tenebræ, & illi dicatæ tranquilla silentia noctis.

## I I I.

SOMNUS ad rationem sanitatis dirigi debet, & Naturæ votis respondere, quæ cum sensuum quiete solidam humorum & spirituum instaurationem nova ex assumptis cibis generatione molitur. Tunc enim tota ad res suas domesticas attenta, mutuo partium sibi spontè inservientium auxilio coctiones perfici-

cit: Et ne tam diu quasi mortua & sepulta veterno jaceat, somnum moderatum exigit, qui viscerum cibus est, fomentum, recreatio. Sicut autem modum excedens vigilia Corpus impensè macerat & exedit, soletque intemperiem siccam inducere, sanguinem & spiritus superstites jamdiu agitados immutare, bilique facies admove, quæ soluto fræno pristino licentiùs furit, & tunens, exultans inque flammas erumpens, modo febres varias, modo dysenteriam, choleram, pleuritidem, amplamque morborum hisce affinium fecuram producit: Similiter somnus plenior, & ultra justos fines terminosque progressus, occultæ esse solet pernicipi visceribus, dum tunc temporis longiori morâ collectus ingenio suo vorax natus calor, sui ipsius pabulum depascitur, adeo ut, qui servator & sospes fuerit desideratus, hostiliter sæviat & grassetur in vitam, cujus interest maximè fundum non exarescere. Sic quæ refertur accepta Naturæ vita, hocce casu miserabili divulsa concidet, diesque fatalis maturabitur, licet ab eâ, nec ars ulla, nec ullum pharmacum possit quemquam vindicare.

## I V.

**N**EQVE postrema quoque curarum esse debet (ne beluarum more ulla alia sit nisi vorandi ac mox dormiendi vicissitudo) ut inter cibum & somnum interponatur aliquod intervallum, quo tum exercitationibus levioribus Corpus ventiletur, tum Animus ludens & suaviter otiosus, jocundis ad sui relaxationem colloquiis oblectetur, quæ neque gravent Corpus, neque vim ventriculi concoctricem inturbent: atque cum in inflammationibus internis & accessionibus febrium quandiu intenduntur & vigent, somnus æstimetur admodum perniciosus, magnoque conatu sit prohibendus, qui cæteris temporibus non mediocri futurus est adjumento: haud aliæ sunt benè valentibus servandæ leges, nec momenta alia ponderanda, quos ita parari & instrui oportet ad somnum ineundum, ut nunquam ab illius tempore minus apto, seu infesto & iniquo non abhorreant, eamque huic se tradendo capient opportunitatem, quâ non tumultuosus sed placidus concilietur, quem purgatissima, si quæ eveniant, comitentur insomnia; E quo Natura, quæ priùs in operibus languidiùs versabatur, excitata, recreata se ac planè restitutam perferat, factâ videlicet accessione novâ caloris & spirituum naturalium vitalium animalium specie distinctorum, qui nec ullo vitio, nec ullis

4

fordibus inquinati, toti splendeant, ex quorum uberibus copiis  
habilis membris venit vigor, totius Corporis emergit integritas,  
Animusque ad cogitandum melior redit.

V.

**S**OMNUS hisce omnibus fraudat bonis, sexcentisque præbet incommodis rudimentum, qui cibos mox ingestos in ventriculum quam proximè subsequitur: Siquidem dum aridi cum humidis aliisque cum aliis diversæ substantiæ confunduntur inter se atque permiscuntur, nec non frangi & comminui, mutari & concoqui incipiunt, Naturæ vis omnis gravatur & in potestatem ac sævitiam humorum superfluatorum venit, quibus expurgandis per vigilias semitæ patent, quæ per somnum intercluse perhibentur; qui ut duræ sunt indolis perditique moris, œconomix naturalis statum pedetentim convellunt: Ecquis enim credat, inclusis his in Corpore pestibus, tutam & turbarum securam diutissimè vitam stare posse: quippè non tantum in venas irrepunt inficiuntque sanguinem, sed fumosis exhalationibus sacram Palladis arcem adoriuntur, obsident & nativam ejus temperiem pessundant: Hæc vero in serum molestissimum solutæ, fluxionum multiplicis generis sunt parentes, alias aliasve partes subjectas vicissim affecturæ, nova quærentes loca ubi vestigia figant, pulmone sæpè pacem adimunt, ipsique labem inurunt inemendabilem: Capite coercitæ, gravedinem importunam pariunt, serena sensuum organa impurâ suâ illuvie sædant, soporem inducunt vitæ inimicum & insidiosè rapiunt; paralytim, apoplexiam aliosque gravissimos affectus accersunt: adeo pervertitur atque depravatur isthæc naturalis affectio in iis quos tam adverso tempore complectitur & occupat: quos denique dormientium placidissima quies perpetuò deserit, & vigilantium ad omne ministerium agilitas summè expedita deficit.

*Ergo vitandus somnus statim à cibo.*

Proponebat Parisiis JOANNES-MICHAEL GARBE,  
Parisiensis, Baccalaureus Medicus. A. R. S. H. 1683.

---

Apud Franc. Mugnet, Regis & Facultatis Medicinæ Typographum.